



Ramon Bärtschi e Chiara Putzi èn vi da preparar la tratga, accumpagnads dal moderatur da la concorrenza.

FOTOS RTR/LAURA SCHÜTZ

La «Kitchenstory» – in cumbat cun chazzettas e cuntels per dapli atenziun

Preparar in bun menu – sche pussaivel pli gustus che quel da la gruppa adversaria: Quai è stada l'incumbensa dals emprendists e da las emprendistas a la concorrenza culinaria «Kitchenstory» ch'ha già lieu ils 5 e 6 d'october a Cuir. La finamira da l'occurrenza è era stada da far reclama per la clamada dal cuschinier e da la cuschiniera.

LAURA SCHÜTZ E SABRINA BUNDI/RTR

En la cuschina en ina tenda transitorica sin la Piazza da teater a Cuir è vegnì brassà, frittà e cundì quest'emna tut a dubel. Las gruppas cun mintgamai trais cuschiniers/as han già adina in'ura temp da striunar in menu sin il taglier, in menu che duai persvader ina giuria da quatter personas. Lur pensum: In menu da pesch cun ina sosa, in supplement e dus differents legums.

Duas emnas han las 36 participantas e participants che fan actualmain in emprendissadi sco cuschinier u cuschiniera en il Grischun già temp da chattar in recept. Tranter els èn era stads da la partida ils Rumantschs *Dario Lorenzo* da Puntraschigna e *Chiara Putzi* e *Ramon Bärtschi* da Falera. Ils dus Sursilvans han servì ensemen ina forella temprada cun ina crevetta grillada e vitiers tschintg variaziuns da chicras. Ramon Bärtschi ha manegià envers RTR, suenter lur cuschinada: «Nus avain sagià e chattà per bun la tratga – ussa spetgain nus per tadar tge che la giuria di!»

Far attent a la mancanza da personal

Tar l'occurrenza «Kitchenstory» a Cuir n'èsi dentant betg i en emprima lingua per chattar il meglier ubain la meglra junior-cuschinunza, mabain per carmalar dapli personas giuvnas en la professiun. *Toni Curdin Foppa*, il president dal comité d'organisaziun, ha rendì attent envers RTR ch'adina pli paucas personas veglian daventar cuschinunz u cuschinunza, perquai che las cundiziuns da lavur, per exempel areguard l'ura da chombra, na sajan betg idealas. Ils ultims onns saja l'interess sa sminuì ferm, era pervia da la pandemia. L'onn 2021 è il dumber d'emprendists ed emprendistas sa reduci perfin per 40%. Cun diversas acziuns da promozion sco ils filmins da la «GastroStory» sin las medias socialas – ubain cun la «Kitchenstory» – vules la branscha cuntanscher meglier ils giuvenils e las giuvenilas.

Novs models da lavur

Il mainagestiu da «GastroGrischun», *Marc Tischhauser*, ha ditg envers RTR che las professiuns gastronomicas hajan blers aspects positivs, sco p.ex. da pudair far viadis u da pudair esser creativ. Tuttina saja impurtant da pussibilitar novs models da lavur sco p.ex. il «jobsharing». Marc Tischhauser: «Nus essan conscients che nus ans stuain era sviluppar vinvant concernent las cundiziuns da lavur.»

Franz Sepp Caluori, il president da «GastroGrischun» ha agiuntà en quel connex ch'i dettia bleras pussaivladads en la gastronomia per sa scolar vinavanat e per obtegnair posts da lavur cun bunas pajas.

L'associaziun «GastroSvizra» n'inditgescha en il contractiv da lavur nagina paga minimala per personas minorenas. Per personas maio-

renas prescriba il contract enturn 3500 francs per collavuratur e collavuraturas senza emprendissadi. Per personas cun in emprendissadi AFQ (EFZ) è la paga minimala enturn 4000 francs.

«Jau vules avrir in agen restaurant»

Ina part dal problem e da la mancanza da personal è che 70–80% dals giuvenils e da las giuvenilas midan branscha suenter l'emprendissadi. E co vesan damai dus dals trais cuschiniers rumantschs lur avegnir? – Dario Lorenzo e Chiara Putzi quintan da restar fidaivels a lur professiun, sco ch'els han tradì ad RTR. Dario Lorenzo ha ditg ch'el pudess s'imaginar d'esser in di schef da cuschina en in agen restaurant. Ils dis variants e l'ambient da lavur è quai che plascha il meglier a Chiara Putzi.

Ed insomma: co ha valità la giuria il menu da la squadra da Chiara Putzi e Ramon Bärtschi da Falera? – La cuschiniera da renum svizzer, *Rebecca Clopath*, ha dà giu in bun giudicat per lur «Kitchenstory»: «Il gust era bun, i veseva ora bain ed i han lavurà bain. Propi super. Tenor mai èsi stà fitg bun, sch'ins resguarda ch'els èn anc en lur emprendissadi.»

«Il gust era bun, i veseva ora bain ed i han lavurà bain. Propi super.»

Rebecca Clopath, cuschiniera e giurora



Ils Rumantschs Dario Lorenzo e Chiara Putzi èn stads dus dals 36 emprendists ed emprendistas.